

Vitgs muntagnards en il focus

Grischun Vacanzas tschertga ils diesch vitgs muntagnards ils pli bels

DA SUSI ROTHMUND / FMR

■ **Actualmain po vegnir votà via medias socialas per 30 vitgs muntagnards dal Grischun e quai da Tschierschen enfin Tschlin, da Breil enfin Braggio. Ils vitgs en elecziun èn vegnids proponids da Grischun Vacanzas che tschertga uss ils diesch vitgs muntagnards ils pli bels.**

Sin la pagina d'internet da Grischun Vacanzas vegni fatg reclama per «sa revegnir en il vitg muntagnard», ed ils visitaders da la pagina pon leger vinavant: Igl exista in Grischun lunsch davent dals lieus turistics enconuscents. Quai èn vitgs muntagnards idillics cun nums sco Tschlin, Soglio u Spleia, che dattan tempra alla regiun da vacanzas svizra multifara cun sias trais linguas e las vals originaras. Quai èn oravant tut quels pitschens e fins lieus, ils quals raquantan da pli baud, dal cumbat dals umans cun la natira e che valan oz sco ruassavilas oasas en in mintgadi hectic. Là vegnan ils ospes salidads cun in cordial «buongiorno!», in «allegra!» u er cun in «grüazi!», entamez ina cuntrada muntagnarda magnifica e singulara.

Qual è il pli bel vitg muntagnard?

Quals vitgs muntagnards tutgan per vus tranter ils diesch ils pli bels dal Grischun? Per ils lieus favurissads po anc vegnir vuschà enfin ils 31 da schaner via www.graubuenden.ch/bergdoerfer. En elecziun èn Tschierschen, Val S. Pieder, Bravuogn, Breil, Soglio, Viano, Guarda, Curgaglia, St. Antönien, Isola, Poschiavo, Sent, Schlans, Fanas, Zuoz, Veulden, Vrin, Andeer, Sertig Dörfli, Furna, Riom, S. Maria, Tschlin, Braggio, Spleia, Obermatten, Tenna, Monstein, Latsch e Filisur. Tranter tut las participantas ed ils

participants tira Grischun Vacanzas la sort per duas pernottaziuns per duas persunas en in alloschi en il vitg victur u en la vischinanza. En mintga cas èn els in pli bel che l'auter.

Actualmain è Tschierschen il vitg muntagnard favurissà da votantas e votants. Ier da mezdi aveva Tschierschen 1686 vuschs, suandà da Breil cun 1045 vuschs sin il segund plaz. Per il terz plaz cumbattevan ier da mezdi Soglio (809 vuschs), Bravuogn (803 vuschs) e Val S. Pieder (802 vuschs). Il link per la concorrenza dals diesch vitgs muntagnards ils pli bels vegn partì savens via plattafurmas da socialmedia sco Facebook, Twitter ubain Instagram. Entgins fan reclama per la vischnanca burgaisa, auters per il lieu da domicil e puspè auters simpla-

main per in lieu il qual plascha u per in lieu da vacanzas favurissà.

Gia passa 11 600 vuschs

Sco che *Luzi Bürkli*, il manader da la communicaziun d'interpresa tar Grischun Vacanzas, ha declarà sin dumonda da la FMR duai quell'acziun oravant tut attrair l'attenziun. Quai saja ina buna publicitad per il chantun Grischun ed ils vitgs muntagnards. Tar l'elecziun dals 30 vitgs muntagnards sajan tuttas destinaziuns en il chantun vegnidadas resguardadas. Là nua ch'i dettia cooperaziuns da marketing hajan las destinaziuns sezzas pudè proponer ils lieus. Tenor Bürkli haja quell'acziun in bun caracter da mussavia, damai ch'il publicum – pia ospes e la

populaziun indigena – dettia lur vusch al vitg muntagnard preferì.

L'acziun ha plinavant generà passa 120 commentaris. Bliers scrivon simpla-main en il commentari il num da lur vitg preferì, auters mettan vitiers ina fotografia, puspè auters inditgeschan forsia in lieu che nun è en elecziun. «Las ideas ed opiniuns dals participants èn interessantas», di Bürkli. Tenor el èn talas acziuns da reclama fitg autenticas, uschia haja Grischun Vacanzas era gi success l'onn 2017 cun l'acziun per las pli bellas sendas da viandar en il Grischun. Er ils diesch tips per l'enviern, ils quals èn actualmain da chattar sin la pagina d'internet da Grischun Vacanzas mainan per la pli gronda part en vitgs muntagnards u en la vischinanza da tals.



Era Breil tutga tranter ils 30 vitgs muntagnards dal Grischun, ils quals pon vegnir elegids sco ils pli bels en il chantun. Actualmain è Breil sin il segund plaz.